

il numero zà passati nel suo campo. Questa mattina, in Concistorio, era stà liberato il cardenal Sauli, qual vene vestito da prete con la bareta paonaza per il corador in Concistorio senza esser visto; qual inzenochiato, il Papa li fece una repression, poi lo abrazoe perdonandoli etc. Pur *etiam* lui è restato in le stanzie in Palazzo. Et el cardenal Voltera ha richiesto al Papa poter star in le terre di Colonesi e in una terra in Campagna. Il Papa à contentato, con questo li oratori de li principi prometino quanto ha promesso a li altri; e cussì eri il Papa richiese li oratori di tal promission. Tutti ge la feno, excepto quel di Anglia, volse 4 mexi di tempo, e lui Orator nostro tolse do mexi. Il Papa disse: « È tropo », e volse avesse uno solo mexe; et cussì l'Orator contentò e harà la scrittura et manderà a la Signoria. *Item*, ricevete letere nostre con le nove dil Turcho; comunicherà al Papa. Monsignor Villabrama, orator francese, parte subito per Franza. *Item*, il capitolo di Franza è, come li oratori cesarei e dil re Catholico è stati con questi signori sopra i forausiti; si tien la Signoria si acorderà con l'Imperador, e l'Orator venuto li à dà le letere di la trieva, qual dura ancora per uno anno; e di aversi messo in li do Re le differentie, e le letere di ducati 25 milia li diono dar per le trieve adesso; et ha voluto *etiam* letere di le trieve da essi oratori.

308* *Da Napoli, dil Consolo, di 25.* Come de li è pocho da conto; il Vicerè starà a l'Aquila con do altri signori iti a lui, nominati in le letere. *Item*, è letere di Palermo, di sier Pelegrin Venier consolo nostro, di 14. Come quel Governador à pur di fastidii per li mali portamenti fano alcuni; e ben si dice *omnes insulæ sed Siculi pessimi*. E quel Governador alcuni à mandati fuora de l'isola, altri dal re Catholico; si va procedendo etc. *Item*, le galie, doveano andar a Gaeta, si partiranno etc. Scrive sopra il fato suo, nè altro di novo.

A di 5. La matina, nulla da conto fo in Colegio.

Da poi disnar, fo Colegio di Savii *ad consulendum*.

Et reduta la Quarantia criminal, preseno, quel sier Francesco Venier qu. sier Marco da Riva di Biaxio, che fu preso retenir tra e Consieri et è absentado, per loro incolpado, fo *iterum* preso proclamarlo etc., justa le leze nostre.

Fo dito una nova, *incerto auctore*, che la galia di Alexandria, capitano sier Hironimo da Canal di sier Bernardin, poi licentiada dal Signor turcho di

Alexandria, e mia 20 in mar, fu fata tornar; e trovato schiavi scosi in galia, el Signor havia fato tagliar la testa al capitano sier Contarini patron di la galia, e retenuta la galia; *tamen* non si sa chi porta questa nova. Fo dito sier Bernardo Moro qu. sier Lunardo l' à da sier Carlo, so' fradelo, dal Zante; ma fu per il Principe domandato: disse non aver nulla.

A di 6, fo San Salvador. Vene in Colegio Naldin Grando patron di una barcha longa dil Papa, qual è venuto dicendo Luni verso Pexaro fo a le mano con l'armada di Francesco Maria di certe barche, over do altri navilieri, et quella rupe, et il Cardenal li promesse ducati 50; non li ha voluti dar, ma donati li diti legni; qual li ha conduti de qui, et è soi. *Item* disse, Francesco Maria a Rimano haver combatuto et taià a pezi da 1000 sguizari nel borgo e brusà parte dil borgo; con altri avisi, qual referi a bocha *pleno Colegio*.

Di Hongaria, di sier Alvisè Bon dottor, orator nostro, date a Buda a di 19 Lujo. Come à comunicà le nove dil Turcho al Re e quelli signori; le qual nove è di 9 Mazo, aute per letere di 25 Zugno. Il Re ringratia molto la Signoria, e cussì li altri signori, pregando il perseverar. Il Re atende a li soi soliti piaceri; e li signori, erano stati in la dieta, sono partiti e andati a' loro poderi. È zonto la confirmation dil Papa di la legation al cardenal Strigoniense per uno altro anno e mezo. *Item* scrive, spaza queste letere senza spesa di la Signoria.

Da poi disnar, fo Colegio di la Signoria e Savii e 309 Cai di XL per aldir li Savorgnani con domino Hironimo Savorgnan etc. Parloe sier Carlo Contarini avochato; li rispose esso domino Hironimo Savorgnan.

Noto. Fu terminato mandar sier Michiel Malipiero, patron a l'Arsenal, per le terre nostre da terra per aver legnami e canevi; et fatoli la commission per Colegio. Parte *immediate*.

Di Treviso, di sier Polo Nani podestà e capitano, di 6. Zercha danari di la camera, molto longa, e non è modo di pagar, *ut in litteris*. È stà il nontio dil Governador per danari; li ha dà bone parole etc. *Item*, per una altra letera, scrive di le fabriche, quello el fa, el bastion di Santa Bona; con altri avisi sopra ditte fabriche.

A di 7. La matina, nulla da conto. Fo terminato ozi far Pregadi per scriver in Franza, et far quelli sora Colimo, et ordenato poi far Consejo di X per aver danari di le 30 et 40 per 100 di ducati 6000 fo ubligati di tal raxon per il Consejo di X per l'Arsenal, perchè non è da pagar le maistranze.